


Ni Presidente
Thomas S. Monson



Kasapulan ti Apo dagiti Misionario

Itay napalabas nga Oktubre iti sapisap a komperensia nangawagak iti ad-adu pay a misionario. Tunggal maikari, makabael nga agtutubo a lalaki ket masapul nga agsagana nga agserbi iti maysa a mision. Ti kasta a serbisio ket pagrebbengan iti priesthood—maysa nga obligasion a namnamaen ti Apo kadatayo a naikkanen kadagiti nawadwad unay a parabur. Agtutubo a lalaki, ibalakadko kadakayo nga agsaganakayo para iti serbisio a kas misionario. Pagtalinaedenyo dagiti bagiyo a natarnaw ken maikari a mangibagi iti Apo. Pagtalinaedenyo ti salun-at ken pigsayo. Adalenyoy dagiti nasantuan a kasuratan. No adda a magun-od iti lugaryo, makiramankayo iti seminary ken institute. Adalenyoy a naimbag ti hanbuk ti misionario a *Preach My Gospel*.

Kakabsat a babbai, idinto ta awan ti pagrebbenganyo iti priesthood a kas kadagiti agtutubo a lalaki tapno agserbi a kas full-time a misionario, makaaramidkayo met iti napateg a tulong kas misionario, ket awatenmi ti serbisioyo.

Kadagiti nataengan a kakabsat a lalaki ken babbai ti Simbaan, ipalagipko kadakayo a kasapulan ti Apo dagiti ad-adu pay kadakayo tapno agserbi a kas full-time a misionario. No awankayo pay iti umno a panawen iti biag tapno agserbi iti mision kas agassawa, ipaganetgetko kadakayo nga agsaganakayo itan para iti aldaw, no ipalubos dagiti kasasaadyo, a mabalinyon nga agassawa

nga aramiden daytoy. Adda dagiti sumagmamano a gundaway iti biagyo nga agragsakkayo iti nasam-it nga espiritu ken pannakapnek a sumangbay manipud iti panangtedyo nga agpada iti full-time a serbisio iti aramid ti Apo a Maestro.

Ita, mabalin a kadawyan a managbabain ti sumagmamano kadakayo wenno ibilangyo nga awan kabaelan ti bagiyo a sumungbat iti wen iti awag nga agserbi. Laglagipenyoy a daytoy ti aramid ti Apo, a no addatayo iti panangibaon ti Apo, maikaritayo iti tulong ti Apo. Sukogento ti Apo ti likud a mangibaklay iti awit a maikabil ditoy.

Dagiti dadduma pay, nupay maikarida nga agserbi, ket makarikna nga ad-adu pay dagiti napatpateg nga ipangpangrunada. Kasta met a malagipko ti kari ti Apo: “Dagidiay a mangdayaw kaniak dayawekto” (1 Samuel 2:30). Awan kadatayo ti ad-adda pay a mangdayawto iti Nailangitan nga Amatayo ken iti Mangisalakantayo no di ketdi babaen iti panagserbi a kas napasnek ken manangngaasi a misionario.

Maysa a pagwadan ti kasta a serbisio ket ti padasda kas misionario da Juliusz and Dorothy Fussek, a naawagan a mapanda agmision iti Poland. Nayanak ni Brother Fussek iti Poland. Agsasao isuna iti lengguaheda. Inayatna dagiti tao. Nayanak ni Sister Fussek iti Inglatera ket ammona bassit maipapan iti

Poland ngem awan ti ammona maipapan kadagiti umili ditoy. Iti panagtalekda iti Apo, tinungpalda ti naituding nga aramidenda. Naliday ti aramid, ken kasta unay ti kaadu dagiti aramidenda. Iti dayta a panawen ket saan pay a naipasdek ti mision iti Poland. Ti naituding nga aramiden a naited kadagiti agassawa a Fussek ket mangisagana iti wagas a pakabuangayan ti maysa a mision.

Napaay kadi da Elder ken Sister Fussek gapu iti kinadakkel ti naituding nga aramidenda? Saan uray pay apagkanito. Ammoda a naggapu iti Dios ti awagda. Nagkararagda iti nadosan a tulong, ket naimpu-suan nga indatonda ti bagbagida iti naituding nga aramidenda.

Iti maysa a gundaway kaduak da Elder Russell M. Nelson ti Korum dagiti Sangapulo-ket-dua nga Apostol; ni Elder Hans B. Ringger, miembro ti Pitupulo idi, a kinuyognakami ni Elder Fussek, ket nakipagkitakami iti ministro ti pakaseknan ti relihion, ni Adam Wopatka, ti gobierno ti Poland. Nangngeganmi a kinunana, “Maawat ti simbaanyo ditoy. Mabalinyo a bangonen ti simbaanyo; mabalinyo nga ibaon dagiti misionarioyo. Daytoy a tao,” a mangitudtudo ken ni Juliusz Fussek, “ket nagserbi a nasayaat iti simbaanyo. Makapagyamankayo gapu iti pagwadan ken aramidna.”

Kas kadagiti agassawa a Fussek, aramidentayo koma ti nasken nga aramidentayo iti aramid ti Apo. Kalpasanna, kaduatayo da Juliusz ken Dorothy Fussek, mabalina nga ulitentayo nga isawang ti Salmo:

“Ti tulongko aggapu ken ni Jehova a nangaramid iti langit ken daga.

“. . . Daydiay agaywan kenka dinto agridep.

“Adtoy ti agaywan iti Israel saanto nga agridep dinto met agturog” (Salmo 121:2–4).

PANANGISURO MANIPUD ITI DAYTOY A MENSAHE

Teaching, No Greater Call dakamatenna: “Mangiburayka iti bukod a padas no kasano a pinaraburan ti biagmo ti panagtungpalmo iti maysa a pagbatayan ti ebanghelio. Awisem dagiti sursurua a mangiburayda iti ababa kadagiti bukodda a padas” ([1999], 159). Basaem daytoy a mensahe ket kalpasanna saludsodem kadagiti miembro ti familia

no asino ti kinuna ni Presidente Monson a nasken nga agserbi iti mision. Iburaymo dagiti bukodmo a padas wenno padas dagiti dadduma idi nagserbika wenno nagserbida kas full-time a misionario. Wenno iburaymo dagiti planom nga agserbi a kas misionario iti masakbayan. Kiddawem kadagiti miembro ti familia a mangiburayda kadagiti planoda ken dagiti nasayaat a padasda.

AGTUTUBO

Agbisikleta iti Masakbayan

Da Peter Evans ken Richard M. Romney

Adu nga agtutubo a lallaki ti pinansial nga agsagana tapno agserbi iti mision. Iti Africa paset dayta a panagsaganada ri panangullo iti umdas a kuarta para iti maysa a pasaporte. Nakaullo ni Sedrick Tshiambine iti no ania ti kasapulanna iti wagas a panaglako: babaen ti panaglakona kadagiti saba manipud iti likud ti maysa a bisikleta.

Agingdeg ni Sedrick iti Luputa, Democratic Republic ti Congo. Maysa isuna kadagiti 45 a babbarito iti distrito ti Luputa nga agtartrabaho tapno makaurong iti kuarta para iti maysa a pasaporte a mapan iti mision. Iti DR Congo agbalor iti \$250 ti maysa a pasaporte, nga agarup mamintallo ti kadakkel ti gatad ti panangbangon iti maysa a balay.

Ngem saan a nagamak ni Sedrick. Inullona ti pagmisionna a kuarta babaen ti panagbisikletana iti 15–30 kilometro (9–19 milia) manipud iti Luputa agingga kadagiti babassit a purok, a paggatanganna kadagiti saba, sa agbisikleta nga agsubli iti napudot a kapatagan ti Africa, a napno ti bisikletana kadagiti nadagsen a kargana a prutas nga ilakona iti ciudad. Tunggal lawas agbiahe isuna iti agarup 180 kilometro (112 milia) kadagiti nadarat a kalsada, ket naminsan laeng a natumba gapu ta naawan iti balanse ti kargana.

Gapu kadagiti kinagagetna nakaullo ni Sedrick iti agarup \$1.25 kada lawas, wenno \$65.00 kada tawen. Agingga iti uppat a tawen a nakaurong isuna iti umdas a pangatang iti pasaportena, ngem itan ammona a ti masakbayanna ket maibilang ti full-time a panagmisionna gapu ta pinansial a nakasaganan isuna a mangsunbat iti awagna nga agserbi.

ANNAK

Agsaganaankto Bayat ti Panagubingko

Tapno matulongan dagiti annak a manglagip iti awag ni Presidente Monson nga agserbi iti mision, ibilangyo ti panangaramid iti maysa a sertipiko nga adda suratna iti baba tapno pirmaan dagiti annakyo ken idulin kas maysa a panglagip, nalabit nga ikabil iti diding ti kuartoda wenno iti diurnalda.

AGSAGANAANKTO

Inawagannak ni Presidente Thomas S. Monson nga agsagana nga agserbi iti mission. Siakto ket:

- Pagtalinaedek ti bagik a nadalus ken natarnaw ken maikari a mangibagi iti Apo.
- Pagtalinaedek ti salun-atko ken pigsak.
- Agkararag ken agadalak kadagiti nasantuan a kasuratan.

Agsaganaankto nga agserbi iti mision.

(pirma)

© 2011 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/10. Pannakaanamongna a maipatarus: 6/10. Pannakaipatarus ti *First Presidency Message, January 2011*. Ilokano. 09761 864



Pammati • Pamilia • Tulong

Ti Pakasaritaan ken Tawid ti Relief Society

Adalenyoy daytoy a material, ken no maitutop, paglilinnawaganyo daytoy kadagiti kakabsat a babbai a sarungkaranyo. Usarenyo dagiti saludsod a mangtulog kadakayo a mangpabigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

Nalagip ni Eliza R. Snow ti pannursuro ni Propeta Joseph Smith a “nupay ti nagan a [Relief Society] ket mabalin nga addaan iti kabaruangan a petsa, nagkauna ti nagtaudan ti timpuyog.”¹

Simmarungkar ti Nailangitan nga Ama ken ti Anakna, ni Jesucristo ken ni Joseph Smith ken, babaen kenkuana, insublida ti pakabuklan ti ebanghelio iti daga. Ti Relief Society ket paset dayta a pannakaisubli. Saan a naan-anay ti pannakabukel ti Simbaan agingga a saan a nabukel dagiti kakabsat a babbai.²

Kadagiti dumteng a bulan, mangted kadatayo ti tunggal Mensahe iti Visiting Teaching iti gundaway a makasursuro iti ad-adu pay maipapan iti pakasaritaan ti Relief Society ken ti pasetna iti naisubli nga ebanghelio. Para iti adu a gapu, ti pannakaawattayo iti pakasaritaantayo ket saan laeng a napateg no di ketdi pay *kasapulana unay*.

Umuna, ti pannakaawattayo iti pakasaritaantayo ket mangparegta kadatayo nga agbalin a babbai ti Dios a nasken a pagbalinantayo. Babaen ti panangsuot kadagiti pagwadan dagiti natakng a Santa iti Ud-udina nga Aldaw, makasursurotayo manipud iti napalabas no kasano a sanguen ti masakbayan.³

Maikadua, isuro ti pakasaritaantayo a dagiti isu met la a pagbatayan nga adda iti nagkauna a Simbaan ket pagbatayan a

pundasiontayo iti agdama. Daytoy a pannakaammo ken dagiti panggeptayo—a mangpatibker iti pammati ken bukod a kinalinteg, mangpabigsa kadagiti pamilia ken pagtangen, ken mangtulog kadagiti agkasapulana—ket mangsilpo iti napalabastayo ken iti agdamatayo.

Maikatlo, bayat ti panangipategtayo iti pakasaritaantayo, maiburaytayo a nasaysayaat ti naespirituan a tawid-tayo. Ni Presidente Henry B. Eyring, Umuna a Mammagbaga iti Umuna a Pangulu, kinunana: “Ipasayo ti tawid bayat ti panangtulogyo kadagiti dadduma nga umawat iti sagut a panangngaasi. . . . Ti pakasaritaan ti Relief Society ket naisurat kadagiti balikas ken numero, ngem ti tawid ket maipasa iti puso iti puso.”⁴

Kamaudiananna, ti pannakaawattayo iti pakasaritaantayo ket makatulong iti panagbalintayo a nasamay a paset ti masakbayan ti Relief Society. Ni Presidente Spencer W. Kimball (1895–1985) inlawlawagna, “Amomotayo a dagiti babbai a nalaus ti panangbigbigda iti pateg ti napalabas ket maseknandanto maipapan iti panangsuot iti nalinteg a masakbayan.”⁵

Ni Julie B. Beck, sapasap a presidente ti Relief Society.

Manipud kadagiti Nasantuan a Kasuratan

Ester 9:28–29; Taga-Roma 16:1–2; Alma 37:8; Moroni 7:45–47

Manipud iti Pakasaritaantayo

“Ti Relief Society ket timpuyog ti Apo para kadagiti babbai.”⁶ Iti pagrebenganna a kas maysa a propeta, binukel ni Joseph Smith ti Relief Society idi maika-17 ti Marso 1842. Ti bassit, agduduma iti edad a grupo iti dayta nga umuna a taripnong ket dagiti napasnek a babbai, a kapada dagiti kakabsattayo a babbai iti Relief Society iti agdama. “Ti kaubingan ket ti tallo nga agtutubo, ti kabaketan ket agtawen iti limapulo. Sangapulo-ket-maysa kadagiti babbai ti naasawaan, dua ti balo, innem ti babbalasang, ket saan nga ammo no adda asawana wenno awan ti maysa pay. Dakkel ti pagdudumaan ti adal ken nagtaudanda, kasta met kadagiti kasa-saadda iti ekonomia. Mamin-adu a napadakkel ti pagdudumaanda bayat ti panagtultuloy a panagdur-as ti timpuyog, ngem nasken ket nagtultuloy nga agbalin a sangkamaysa.”⁷

DAGITI NAGADAWAN

1. Eliza R. Snow, “Female Relief Society,” *Deseret News*, Abr. 22, 1868, 81.
2. Kitaen iti *Teachings of Presidents of the Church: Joseph Smith* (2007), 451.
3. Kitaen iti L. Tom Perry, “The Past Way of Facing the Future,” *Liahona*, Nob. 2009, 73–76.
4. Henry B. Eyring, “The Enduring Legacy of Relief Society,” *Liahona*, Nob. 2009, 124–25.
5. Spencer W. Kimball, “Privileges and Responsibilities of Sisters,” *Ensign*, Nob. 1978, 104.
6. Spencer W. Kimball, “Relief Society—Its Promise and Potential,” *Ensign*, Mar. 1976, 4.
7. Jill Mulvey Derr, Janath Russell Cannon, and Maureen Ursenbach Beecher, *Women of Covenant* (1992), 28.

Ania ti Maaramidko?

- 1.** Ania ti maaramidko a makatulong kadagiti kakabsat a babbai a sarung-karak tapno maawatda ti sagut a manangngaasi?
- 2.** Ania ti mairugik nga aramiden itoy a bulan a makatulong a mangsukog iti nalinteg a masakbayan para iti bagik? para iti pamiliak? para kadagiti dadduma?

Para iti mainayon nga impormasion mapan iti www.reliefsociety.lds.org.